

**Inatsisartut suleriaasianni § 37 naapertorlugu matumuuna imaattunik apeqquteqaatinik Naalakkersuisunut saqqummiussivunga:**

Naalakkersuisut sinnerlugit Aningaasaqarnermut Akileraartarnermullu Naalakkersuisup apeqquteqaatigisannut ulloq Novemberip aallaqqaataani 2017 akissuteqaatigisaanut itisiliillunga matumuuna apeqquteqaateqassaanga.

**Apeqqutit:**

- 1. Akissuteqaateqaatigineqartumi Takussutissiaq 1-imi siunnersortinut aningaasat atorineqartut naalakkersuisoqarfikkaarlugit titartaganngorlugit takussutissiorneqarneranni, uku paaserusuppakka:**
  - i. Aningaasat taakku atorineqartut qassit Nunatsinni angerlarsimaffeqartunut siunnersortinut atorineqarpat? Qassillu Nunatta avataani angerlarsimaffeqartunut siunnersortinut atorineqarpat?**
  - ii. Paasissutissat taakku naalakkersuisoqarfikkaartumik immikkoortinneqarnissaat kissaatigaara, kisitsisinnngorlugillu apuunneqarnissaat kissaatigalugu – titartaganngortitserusuttut namminneq titartaganngortitsiumaarmata.**
  
- 2. Ingerlatseqatigiiffiit Namminersorlutik Oqartussanik tamakkiisumik ilaannakortumillu piginneqataaffigineqartut tamarmiusut katillugit aningaasat qassit suliffeqarfiup avataaniit siunnersorneqarneranut atortarpaat?**
  - i. Aningaasat taakku atorineqartut qassit Nunatsinni angerlarsimaffeqartunut siunnersortinut atorineqarpat? Qassillu Nunatta avataani angerlarsimaffeqartunut siunnersortinut atorineqarpat?**
  - ii. Paasissutissat taakku ataatsimoortillugit saqqummiunneqarnissaat kissaatigaara, taamaalilluni inuit ataasiakkaat inuilluunniit ataatsimoortut aningaasarsiaat pillugit paasissutissat, suliffeqarfiillu ataatsip arlallilluunniit niuerfinni unammillernerannik ajoquusiisinaanerannik utoqqatsissutissarsiortoqarani saqqummiunneqarsinnaassammata.**

3. **Taamatutaaq Namminersornersorlutik Oqartussat qassinik nunani allani angerlarsimaffeqartunik nunatta avataani atorfeqartitsinersut, aningaasallu qanoq annertutigisut taakkununnga akissarsiaritineqartarnersut pillugit paasissutissat tamakkiisut kingusinnerusukkut naalackersuisoqarfikkuutaartumik saqqummersillugit nassiukkumaneqartut qilanaarlunga utaqqissavakka.**
- i. **Apeqqutigerusunnarporli novemberip ulluisa aallaqqaataani Naalackersuisumit akissuteqaatigineqartumi kalaallisuuani allaqqammat atorfinnut 108-sunut katillugu aningaasarsiat 34,2 kr.-iusut allaqqammat, tamanna ilumoorinnaanerpa?**
4. **Aammaarlunga kissaatigissavara ingerlatseqatigiiffiit Namminersorlutik Oqartussanik tamakkiisumik ilaannakortumillu piginneqataaffigineqartut tamarmiusut katillugu qassinik nunani allani angerlarsimaffeqartunik nunatta avataani atorfeqartitsinersut, aningaasallu qanoq annertutigisut taakkununnga akissarsiaritineqartarnersut.**
- i. **Paasissutissat taakku ataatsimoortillugit saqqummiunneqarnissaat kissaatigaara, taamaalilluni inuit ataasiakkaat inuilluunniit ataatsimoortut aningaasarsiaat pillugit paasissutissat, suliffeqarfıillu ataatsip arlallilluunniit niuerfinni unammillernerannik ajoquusiinnaanerannik utoqqatsissutissarsiortoqarani saqqummiunneqarsinnaassammata.**

### **Tunngavilersuut:**

Tamatsinnut pingaaruteqarpoq paasissallugu Nunatsinni pisortat ingerlatsineranni, pisortallu piginneqataaffigisaanni aningaasat qanoq annertutigisut avataaniit siunnersorneqarnermut atorneqartarnersut.

Aamma tunngavilersorluakkamik oqallinnissami ilisimassallugu atorfiit qasserpiaat, aningaasallu qassit nunatta avataani suliffeqarfinnut atorneqartarnersut - nunatsinni ingerlatsinitsinni siunnersorneqartariaqarnitsinnut, pisortani pisortallu piginneqataaffigisaanni atorfeqartinneqareersorpasuit saniatigut.

Tamakku tamarmik itinerusumik paasisaqarfiginissaat pisariaqarpoq, tamattami kissaatigaarput imminut napatissinnaasumik aningaasatigut ingerlatsinissarput tamannalu anguneqassappat aamma aningaasat pigineqareersut isumatusaartumik, sapinngisamillu nunatta iluani naleqarnerulersitsinermik annertunerpaamik pilersitsinermik kingunilimmik atorneqartarnissaat qularnaarinneqataaffigissallugu.

Kissaatigaara apeqqutima ullut suliffiusut qulit iluanni akineqarnissaat.



Vivian Motzfeldt  
**Siumut**